

東  
華  
續  
錄

東華續錄

同治四十七

臣王先謙敬編

臣張式恭恭校

閏五月甲子朔諭軍機大臣等曾國藩奏督兵出省日期喬松年奏匪入皖境接仗情形閻敬銘奏賊股竄出東境見在籌辦礮船吳昌壽奏髮逆竄近豫疆帶兵渡河策應各一摺賊首張總愚等竄蒙亳一帶官軍迎戰於龍山頗有斬擒賊由王家窯南遁著喬松年督飭英翰等軍向南跟追並仍防牛洪等股續至務將該逆截斷毋任合併易開倭一軍卽照喬松年所擬駐紮蒙宿一路會同英翰等合力剿洗東境已無賊蹤著吳棠閻敬銘檄令陳國瑞一軍躡剿該逆後隊牽掣賊勢直東兩省見時固不可無重兵防守將來兼須有往來擊剿之軍以資策應未經到防之潘鼎新一

軍宜仍留直隸鎮守劉銘傳所部仍令駐紮山東濟甯一帶專顧北路其往來擊剿之軍或派余承恩或派陳國瑞均由劉長佑閻敬銘酌度辦理閻敬銘欲繕軍籌餉以圖自強並派知府曹丙輝等就河內各船改造試用失之東隅收之桑榆仍未爲晚卽著與劉長佑崇厚妥商辦法以期一勞永逸吳昌壽因賊竄蒙毫欲爲四面擣巢之計又以鄆鉅之賊竄過曹縣前股已至劉口宋防岌岌可慮飭張曜等繞前截擊並抽調湯聘珍一軍渡河與張曜等會合一面親督譚仁芳四營渡河視賊所向策應所籌均妥著卽嚴檄張曜等認真防剿毋令賊蹤深入爲患蔣凝學軍距豫不遠該撫卽飛提到營以資厚集姜玉順等九營屢次諭令官文飛飭赴豫何以尙無到豫消息究竟已至何處該省軍情甚緊兵力甚單儻有疏虞關係非淺著官文仍嚴催該提督星速赴豫如有意

遲延卽行嚴參懲辦歸陳各屬距賊甚近吳昌壽當督飭地方文武整頓兵團以資防禦河洛爲關陝門戶與晉省僅隔一河吳昌壽已派徐邦道一營西紮虎牢關仍恐兵力單薄著沈桂芬整飭防兵嚴扼要隘不可稍涉大意曾國藩督師出省想已到清淮一帶卽著進駐徐州相機調度該大臣必有成算在胸到徐後軍情賊勢隨時馳報以紓南顧之憂東境無賊道路已通國瑞卽督率兩盟馬隊與克興阿等護送僧格林沁靈柩回旗所有欽差大臣關防國瑞卽親齎回京恭繳其溫德勒克西等馬隊仍著畱於山東卽由國瑞酌派一員統帶仍令暫行駐紮曹考一帶閒色爾固善治軍謹嚴兼有謀勇可否派令統帶此項馬隊之處著國瑞酌量辦理此起馬隊曾隸多隆阿部下者居多曾國藩知之有素必能妥爲駕馭見應如何調遣之處卽著妥爲布置曾國藩未經調

派以前如直隸山東有警亦可由劉長佑閻敬銘暫行酌調閻敬銘仍遵前旨馳赴濟甯一帶整頓防兵稽查伏莽務將善後事宜妥爲布置前諭查辦劉銘傳陳國瑞勇丁械鬪一節疊經降旨令劉銘傳駐東防守陳國瑞追賊出境該二員不能約束已有旨嚴行申飭可以無庸查辦矣將此由六百里各諭令知之○留國藩奏查已故兩江總督陸建瀛於咸豐三年退守江甯城陷後被賊殺害經伊家人和祥照料棺殮瘞於水月菴側菜圃中見在該故督之子陸式穀帶同和祥前來江甯臣復派道員陳慶長等眼同啟視遺骸猶存該故督實係當時在城殉難克全大節毫無疑義報聞又奏湖南東征一局係於本省釐金外加抽半釐每貨至卡如本省抽一兩者另抽東征局五錢本省抽百文者另抽東征局五十文爲各省所未有自設局至今已滿五年商民不無疲累臣

危困時所重有賴者在此而數年來所最疚心者亦在此臣見將  
移師山東斷不敢再畱東征局名目以重困商民理合奏明一面  
札飭局員李明墀等將東征局卡概行停止一面函商撫臣李瀚  
章於向抽東征貨釐之中酌擇貨物數種仍畱釐金數成增寫本  
省釐票之內作爲協濟甘肅之餉上從之○乙丑諭內閣前因  
江西巡撫沈葆楨丁憂降旨賞假百日穿孝俟假滿時改爲署理  
江西巡撫嗣據該撫遞請開缺終制情詞懇切不得不俯如所請  
茲據孫長紱奏稱據在籍紳士侍郎李道生等呈稱該撫莅江數  
載德澤及於軍民上年賊犯腹地該撫調度有方立時埽蕩今軍  
務未盡平復鄰氛時虞窺伺請令沈葆楨來江督辦防剿等語自  
係實在情形沈葆楨撫江數年軍民愛戴該省密邇寇氛防剿實  
未能稍鬆從前曾國藩胡林翼張芾李續宜等皆以親喪破格奪

情諸臣雖屢請終制朝廷以得人爲重未允所請皆墨經從戎膚  
功克奏沈葆楨仍當念古人金革毋避之義迅赴江西督辦防剿  
事務毋再固辭○諭軍機大臣等孫長紱奏擊退萍鄉叛勇閩匪  
膺聚上杭等處見籌守禦並韓進春一軍鼓譟奔潰各摺片西征  
叛勇由萍鄉竄至攸縣茶陵經席寶田等軍截擊該匪折向安仁  
狂奔旋由龍海塘竄往郴州屬境著李瀚章激勵將弁實力剿除  
毋令再行蔓延他處該逆雖已敗竄湘省難保不由桂東桂陽折  
回江境孫長紱仍當嚴密防守檄飭劉勝祥等軍嚴扼該逆回竄  
之路以固邊防汪海洋李侍賢等逆見踞上杭武平嘉應等處此  
次嘉應州境被匪竄入何以未據瑞麟郭嵩燾奏報卽著瑞麟等  
督飭官軍迅速掃蕩該逆見竄何處並著隨時奏報以聞賊氛偪  
近贛甯江省東路之防倍形喫緊著左宗棠仍遵前旨不分畛域

督飭官軍越境追剿迅殲醜類以期次第廓清蘇省援閩之郭松林楊鼎勳二軍仍遵前旨飭赴江閩交界處所駐紮以遏賊氛回竄腹地之路參將韓進春所部勇丁因失火鼓譟肆搶商販闖入糧臺搶去辦米銀八千餘兩該參將飭令營官交出滋事匪勇乃各勇丁概行焚營而去奔往高排墟等處聲言欠餉數月必須發足等情實屬目無法紀韓進春著先行革職勒令將滋事營官勇丁拏解來省分別懲辦並著孫長紱督飭張岳齡等將欠餉如數放給妥爲遣散毋令再滋事端並將爲首滋鬧勇丁嚴行懲辦以儆效尤將此由六百里諭知瑞麟左宗棠徐宗幹李瀚章郭嵩燾並傳諭孫長紱知之○諭貴州學政黎培敬奏督撫大吏措置乖方並陳林自清練勇殃民各摺片據稱勞崇光貌託利衷內多偏聽張亮基遇事乖謬忌刻多私任聽其子張臚壽及陸傳應之子



陸佑勤朋比爲奸復引用總兵林自清爲心腹認作義子以致軍務吏治日就隳弛林自清練勇徧布省城及各州縣淫掠殃民各等語勞崇光張亮基經朝廷簡任封圻到黔歲久地方軍務毫無起色每藉口鄰餉不濟畏難苟安其不能振作有爲已可概見茲據該學政奏參勞崇光等徇私偏聽縱賊殃民各情如果屬實殊爲大負委任著駱秉章卽飭臬司趙長齡馳赴黔省按照黎培敬所奏各節嚴密確查據實參奏不准稍涉徇隱林自清窮兇極惡部勇姦淫擄掠無所不至並著妥慎查辦以杜亂萌四川臬司著駱秉章派員署理原摺片著鈔給閱看將此由五百里諭令知之○丁卯諭軍機大臣等傳諭護江西巡撫孫長紱孫長紱奏遵保收復崇仁等縣城出力員弁開單請獎一招其鄧子垣陳鳴志二員所請以臬司記名簡放與吏部新章不符未經照准已准給清

字勇號其餘均照該藩司單開所請悉予恩施矣惟韓進春所部  
勇丁業經鼓譟肆搶紛紛潰散未便再敘前勞因該藩司所開單  
內未將江忠朝等各營分別敘明恐往返駁查致各營出力之安  
分弁勇不得早邀恩獎是以悉照單開所請先行概予獎敘著孫  
長紱於接奉此旨後先將江忠朝等營安分出力員弁分別查明  
將獎敘恩旨先行宣布以示鼓勵其韓進春所部滋事潰散勇丁  
及不能約束之營官等均著詳細查明將所奉諭旨暫停宣示一  
面迅速奏明聲請扣除以昭懲儆所有劉典王開琳兩軍出力員  
弁勇丁仍著孫長紱知會左宗棠迅卽查明保奏俾免向隅尋孫  
長紱奏查明前保韓進春所部員弁請將董德春等官階翎支悉  
予扣除下部知之○予陝西陣亡遊擊楊玉和祭葬世職○戊辰  
諭軍機大臣等劉長佑奏暫駐開州督造船簡練兵馬以防賊

匪回竄及劉銘傳陳國瑞兩軍互關後尙駐長溝相持未動喬松年奏陳近日軍情請飭周盛波等督兵來皖助剿各摺片東省賊匪經劉銘傳陳國瑞等擊敗後悉數南竄惟該逆飄忽靡常見雖距直省稍遠防務究未可遽鬆劉長佑見駐開州督造礮船著卽嚴飭大名道等購辦木料加工修造期於經久可用並著該督將在防各軍勤加操練以備不虞劉銘傳陳國瑞兩軍互關前經國瑞奏請派閻敬銘查辦該兩軍滋生事端劉銘傳等不能約束本有應得之咎前諭閻敬銘毋庸查辦已屬恩施格外陳國瑞自應知感知愧恪遵前旨追躡賊蹤劉銘傳亦當誠諭將士謹守營規不得與陳國瑞部勇較長絮短同室操戈何以尙在長溝相持不下豈謂朝廷不能執法從事耶著國瑞閻敬銘傳知劉銘傳陳國瑞毋庸聽候查辦卽飭陳國瑞剋日督隊馳赴蒙宿一帶追剿若

再遷延卽行從重參處其劉銘傳一軍前有旨飭赴曹考駐紮以作後路聲援並著曾國藩相機調派渦河北岸之高鑑集被賊襲破以致英翰營盤有腹背受敵之勢雖經喬松年調派易開俊張得勝等督勇前進合力勦洗而賊勢太盛仍恐兵力不敷周盛波尙在徐州卽著曾國藩吳棠檄飭該提督迅帶所部前赴宿州一帶會勦毋誤事機郭寶昌一軍前已飭交陳國瑞統帶茲據喬松年奏請派總兵康錦文管帶來皖等語郭寶昌與陳國瑞積不相能此軍隸於陳國瑞部下恐難得力著國瑞卽派康錦文帶赴皖省助勦陳國瑞亦卽統所部前進吳昌壽著卽帶兵馳抵歸德一帶嚴扼賊氛毋令竄越李鴻章所派潘鼎新一軍約計程期卽日可抵大沽直隸有潘鼎新一軍山東有劉銘傳一軍是該二省兵力已厚此時亟應豫籌辦法將來以何項作爲本省防兵何項作

爲本省遊兵又應將何項作爲出省會剿之兵層層布置接應不窮於剿辦流寇較有把握著劉長佑閻敬銘妥籌具奏將此由六百里各諭令知之○諭駱秉章奏官軍攻克階州斬擒首逆及越剿黔匪攻克正安州城一摺所陳周達武等軍攻克階州城垣蔡逆被亂軍殺斃敗逆身受三傷經武字營營官周家盛擒獲等情劉蓉前奏大略相同見在階城已克劉嶽昭之軍越境攻克正州正當乘此聲威節節掃蕩著駱秉章迅卽檄調階州得勝之軍分赴黔邊會合劉嶽昭所部力解遵義之圍次第殲除踞匪俾滇黔聲息相通卽行飭劉嶽昭赴雲南東路勞崇光張亮基亦當督飭黔軍會同川兵實力剿洗豈得專待援師一籌莫展貽誤事機正安州城新復亟須公正廉明之員前往撫綏及辦理善後一切事宜並著張亮基遴委妥員署理正安州缺以資治理前因需

南軍事方殷疊經諭令勞崇光馳赴迤東扼紮督辦計已三月有餘諒該督早經奉到何以勞崇光至今尙未覆奏著仍懍遵前旨迅赴滇省迤東一帶扼要駐紮相機調度毋許飾詞延緩致負委任將此由六百里各諭令知之○諭瑞麟郭嵩燾奏官軍越境剿賊克復平和詔安兩城及大埔防兵疊獲大勝見籌防剿情形一摺據奏侍逆大股撲犯粵境林保一軍於四月二十七日會同閩軍將平和縣城收復其詔安踞匪復經官軍於五月初一日由北路烏山溪東一帶迎擊殺傷甚多隨將縣城克復該逆盡撤永定之圍直趨上杭等語前據左宗棠奏攻克平和皆敘閩軍戰狀並未敘及粵軍並云僅有詔安一城擬卽派郭松林楊鼎勳等軍前往規取此次瑞麟等所奏攻克平和詔安兩城與左宗棠所奏互異且云逆賊有二十餘萬之多方耀血戰數十里誅賊萬餘人語

意近於鋪張著左宗棠迅將平和詔安如何攻克是否會同粵軍之處詳細查明具奏瑞麟等所保出力之方耀等著俟左宗棠奏到再降諭旨瑞麟等所稱已派卓興專駐嘉應以固惠潮門戶並飭林保等移紮平鎮一帶扼守著卽督飭各軍嚴密防剿並著左宗棠仍遵前旨不分畛域越境追剿迅殲醜類俾江粵諸境一律廓清以副委任將此由六百里各諭令知之○諭前因李鴻章奏擊獲投賊洋人白齊文等請旨飭遵當諭令該衙門妥議具奏茲據總理各國事務衙門奏稱此次給予署美國使臣衛廉士照會內歷述白齊文屢次罪狀應查照前議卽行正法該使覆以白齊文既經投賊美國不應庇護惟可否歸在中國嚴辦應請國政訓示如何辦理再爲照知等語該使所稱恭請國政訓示一語自係因甫經接署公使之任一切未敢自專尙在情理之中自應俯如

所請除俟該國照知到日卽由總理各國事務衙門覈辦及餘犯解交各該領事嚴辦外其白齊文一犯著左宗棠李鴻章暫行嚴密押禁聽候辦理此次訪拏出力之稅務司等並著李鴻章查照江浙等省打仗出力之外國員弁給予功牌前案妥爲製辦分別給領以示鼓勵原摺著鈔給閱看將此由四百里各諭令知之○嚴諭步軍統領整頓京師營兵○己巳諭軍機大臣等楊岳斌奏遵旨赴甘請飭蔣凝學一軍仍歸調遣調撥鮑超所買戰馬令唐際盛兼理督餉請飭甘省暫停募勇各摺片楊岳斌於本月初一初二等日督率所部西行擬由東路進省接印視事到省後當懷遵疊次諭旨將防剿事宜交查案件妥速籌辦以副委任山東賊股分竄劉口永城歸陳喫緊豫省見無重兵蔣凝學一軍已疊次諭令赴豫歸吳昌壽調遣著俟河南肅清再令該道赴甘楊岳斌



此時惟當就見有兵力力圖自振以期壁壘一新。晉州見已攻克。林之望等軍尙能得力。該督抵甘後即可就近檄調各營勇丁紛紜滋事。自應暫停招募。著該督卽行飛咨都興阿雷正綰等營一體照辦。以節糜費而免滋擾。鮑超所買戰馬前准曾國藩調赴軍營。本日已諭知理藩院將蒙古捐輸馬匹於距甘較近處所挑選一千匹撥赴楊岳斌軍營。著俟解到後認真訓練。以資得力。李桓舊病未痊。鄂省後路糧臺亦可不另設著照所請派唐際盛兼綜其事。該督卽咨行官文飭該司妥辦可也。另片奏甘省吏治需人等語。除李鶴年卞寶第均係見任大員不准調往外已有旨將。惲世臨發往甘省交楊岳斌差遣委用矣。將此由五百里諭令知之。○庚午國瑞奏親王僧格林沁自咸豐十年統兵剿除河閒一帶土捻各匪十一年親督馬步剿辦捻匪於登萊青各府斃賊數

萬復督勦河北竄匪濮范壽陽悉平回勦曹屬會匪巨惡授首同治元年迎勦捻匪於杞縣尉氏殺賊幾及四萬攻拔教匪於金樓復勦辦捻首李城一股斬馘萬計整軍赴皖進攻捻巢捻斬十數萬人二年擒獲五旗捻首張落刑蘇添幅等同攻山東淄川踞匪鄒縣教匪及宋憬詩股匪先後蕆事南征苗沛霖蒙城圍解苗逆授首淮北肅清僧格林沁忠勇性成身經百餘戰殺賊數十萬行則身先士卒戰則親冒矢石駐則與將士同甘苦雖嚴寒溽暑從無少怠此臣隨營數載朝夕目睹者也上年髮捻各逆竄擾楚豫督軍追勦轉戰千餘里屢挫兇鋒今春窮寇入東僧格林沁疾馳追躡誓欲剋期殄滅四月二十四日探明各逆在曹州府西北高莊集地方我軍分三路進勦該逆亦分股迎拒勢甚兇猛我軍被其衝動力不能支紛紛潰散僧格林沁飛馬趕到率同馬步且戰

且走退紮荒莊該逆悉眾來圍開挖長濠時至三更賊氛愈逼愈近翼長全順等力請僧格林沁衝出重圍再作計議行近賊濠逆眾驚覺紛紛包裹僧格林沁督令隨行馬步開槍擊賊復行數里該逆恃眾四面包鈔僧格林沁並不少怯猶抽佩刀手刃悍賊不期馬受矛傷驚逸以致落馬從人失散比及天明賊退尋視僧格林沁業已被害身受八傷顏色如生該處在曹州府城西北十五里地名吳家店此僧格林沁歷年戰功及死事之詳細情形也上諭內閣僧格林沁事蹟前已有旨宣付史館此次國瑞將僧格林沁歷年戰功及殉難情形詳細查明具奏卽著一併交付史館敘入列傳以昭忠節○諭軍機大臣等恩麟奏北路回匪圍攻中衛縣城及道員黎獻督兵西剿獲勝克復高古城等處賊壘情形並回民闖入大通搶掠旋經解散暨籌備雷正綰軍糧各摺片中

衛縣城與省城西甯甘涼等郡處處相通爲兵糧轉輸要地見在北路回匪分股圍撲該縣城池並撲犯梁生嶽營盤勢甚猖獗萬一中衛有失其患不可勝言雷正綰全部見已進規靈州相距中衛較近著該提督斟酌軍情抽撥勁旅數營迅往援剿以保危城成祿及鶴齡等軍屢經有旨諭令進解安定之圍再行西行著楊岳斌恩麟催令前進如安定業經解圍卽著雷正綰將派赴安定之軍調回數營前赴中衛接替藉資得力楊岳斌抵省後並著分撥勁兵前往援剿至梁生嶽營盤有無失事情形並著楊岳斌恩麟查明具奏黎獻帶兵二千進剿肅甘等處賊匪沿途節節獲勝剿辦尙合機宜惟兵力太單必應步步爲營穩慎圖功方無挫失之患著楊岳斌恩麟飭令黎獻激勵兵團將梨園永固等處賊匪次第殲除再行酌度軍情安籌進取大馬營千總馬國慶甘心從

逆實出情理之外並著檄令黎獻設法捕拏訊明實情盡法懲治  
高古城回匪經官軍攻克後搽戮無遺新城堡亦卽克復辦理尙  
屬迅速其署古城千總祁延林是否被賊裹脅抑係有心從逆並  
著飭令黎獻訪查詳確據實參奏西路回民藉口漢團未散突入  
大通縣城大肆搶掠倉庫監獄一併被劫被傷人命甚多雖據回  
目馬壽等悔罪投誠呈交贓物而監犯及首惡並未捆獻斷難憑  
信該回民詭詐多端總欲撤去漢團得以肆行無忌萬不可墮其  
術中恩麟見因兵力不敷勦辦暫准投誠卽著嚴飭達昌責令該  
回目等將起事首惡及劫放監犯立即交出不准藉詞宕延致墮  
詭計各鄉團練仍應聯絡整備不可輕議裁撤如果該回眾等尙  
知悔罪息事亦不得無端肇釁著玉通恩麟隨時飭令該地方官  
先事豫防妥籌辦理西甯一帶防守事宜並著玉通認真妥辦所

有大通縣城被擾情形仍著恩麟確查具奏雷正綰一軍需用口糧麥麪卽著恩麟飭令慶陽所屬一州四縣設法勸辦運送供楊能格卽就近督同慶陽府知府嚴飭所屬實力勸辦源源運送毋令缺乏雷正綰所需月餉支絀異常並著楊能格飛催各路協餉隨時撥解毋稍延緩恩麟仍當設法接濟以應要需前據吳昌壽楊岳斌先後奏稱甘肅派往各省募勇沿途滋擾等語著都興阿雷正綰查明約束不嚴各員據實參奏見在甘省兵勇已不爲少足敷剿辦所有派往各省募勇之處卽著暫行停止吳昌壽楊岳斌原片各一件著鈔給都興阿雷正綰閱看將此由六百里諭知都興阿穆圖善雷正綰楊岳斌玉通並傳諭恩麟楊能格知之○辛未 上復詣 大高殿祈雨○諭軍機大臣等李瀚章奏擊退霆營叛勇楚境肅清賊蹤竄粵一摺此起叛勇由攸縣竄陷安仁興

甯經張義貴等追剿將賊擊退復經陳士杰周興隆在小良出百丈嶺等處截擊擒馘無算剿辦尙爲得力惟賊見由粵東竄去則樂昌一帶必須有攔截之兵方不至延蔓爲患前因賊蹤飄忽恐其竄入兩粵滋擾地方曾經諭令瑞麟等派兵防堵此時賊蹤已竄粵東境內瑞麟等務當派出防軍實力扼截一鼓殲除李瀚章亦當督飭陳士杰帶兵越境會同粵軍覘賊所向合力兜剿不得稍分畛域其屯紮郴宜之和字威信等營並著李瀚章相度機宜妥籌調派此賊旣悍且衆奔竄靡定或由粵東竄江或仍回竄楚境以入粵西均不可不豫爲防範李瀚章劉坤一尤當派撥兵勇嚴扼本境劉坤一未到任以前孫長絨責無旁貸並著張凱嵩先事籌防毋稍大意將此由六百里諭知瑞麟李瀚章劉坤一張凱嵩郭嵩燾並傳諭孫長絨知之○壬申諭軍機大臣等李鴻章奏

潘鼎新一軍由滬航海赴津並余在榜一營難再撤回一摺潘鼎新一軍業已到津卽著劉長佑飭令雇備船隻由水路前赴張秋一帶扼要駐紮余在榜洋槍隊一營卽已北來卽令與潘鼎新一同駐守直東交界要地聽候調遣前經諭令直隸山東每月各撥銀一萬五千兩爲該軍餉項著劉長佑閻敬銘督飭藩司源源解濟如尙不敷直隸准於天津關動支山東准於東海關動支必須寬爲籌備不可稍有遲延缺乏等事已革道員童埏旣據李鴻章稱其廉明精細能耐勞苦於直東情形較熟卽派童埏經理此軍糧餉藉資得力並著崇厚督同該革員妥爲辦理崇厚駐軍東昌於此軍可以聯絡聲勢設有緩急當通融接濟毋令孤軍遠役呼應不靈劉長佑在開州督造礮船著卽趕緊辦理賊匪如有由豫回竄消息或水套伏莽應須剿捕著俟潘鼎新等軍稍爲休息酌



量布置調遣曾國藩此時應已到徐蒙毫一帶賊勢若何當有奏報在途潘鼎新等駐師張秋係爲屏蔽北路惟此起勁軍駐於無賊之地甚爲可惜著該大臣酌量調派以期布置得宜前諭劉長佑閻敬銘將本省防兵遊兵及出省會剿之兵妥籌具奏著仍遵本月初五日諭旨趕緊籌議奏聞如皖豫賊匪回竄本境或有土匪勾結起事均惟該督撫是問將此由六百里各諭令知之○諭聯捷奏由陝拔營前進請飭山西按月撥餉各摺片竄陝陶營潰勇業已辦竣聯捷自當迅赴甘肅會合成祿所部剋日西征該大臣見已分隊起程著卽督率馬隊步勇馳赴安定一帶會同成祿及雷正綰所派各軍盡力剿辦一俟安定肅清卽與成祿由甘肅等處節節進剿爲出關之舉不得以在陝坐待軍器稍事遷延該大臣月餉每月需銀八千餘兩此後軍行漸遠甘省蹂躪之區籌

璽非易著沈桂芬按月撥實銀八千五百兩解交聯捷軍營務須源源接濟毋使停兵待餉致誤要需將此由四百里各諭令知之○諭張凱嵩奏擊退泗城竄匪追擒首逆邊圍肅清官軍進規那檀山澤賊巢生擒賊渠各一摺逆匪廖萬服等由滇黔邊境回竄西林縣經知府鄧雲襄等督率兵團實力進剿當將廖萬服楊通潮擒獲剿辦尙爲得手逆首廖萬福楊通潮著就地極刑處死以申國法而快人心泗城見雖肅清而摻捕遺孽安撫地方在在均關緊要卽著張凱嵩督飭屬員妥爲辦理此股餘匪悉向廣南竄去若不按除淨盡難保不死灰復然又逞其兇狡之謀蔓延滇粵毗境著勞崇光嚴檄廣南府知府帶領兵練會同粵西官軍協力勦洗痛殄逆氛並著張凱嵩督飭派出官軍越境追剿務將此股餘匪悉數聚殲毋任一名漏網逆首孫芒廣梁安邦盤踞那檀山

澤等處經劉坤一率師進攻疊平逆壘梁逆見已成擒那檀不難  
卽下自可騰出兵力以合山澤之圍著張凱嵩激勵將弁卽將那  
檀山澤等巢迅速攻拔以期次第廓清疆圉劉坤一業已簡放江  
西巡撫著張凱嵩傳知該撫迅赴新任毋稍延緩那檀等處防剿  
事務如接替無人卽著馮子材前往督辦一切布置機宜仍著張  
凱嵩會同籌商妥爲辦理將此由六百里各諭令知之○以魁齡

伍忠阿俱爲內閣學士

魁齡由詹事伍忠阿由少詹事遷

○甲戌諭內閣前因浙

江疊遭兵燹小民流離失所諭令左宗棠將杭嘉湖三屬應徵漕  
糧稅則查明各按重輕分成奏請減免嗣據奏請將杭嘉三屬漕  
糧酌量覈減經戶部議覆統按原額於三十分中減去八分業經  
降旨允准茲據左宗棠馬新貽奏稱查明杭嘉湖三屬漕糧除南  
糧並白糧春耗兩款毋庸議減外杭州府九州縣額徵米十七萬

八千一百八十九石零擬減米二萬五千七百三十五石零嘉興府七縣額徵米五十八萬七千四百七十五石零擬減米十四萬五千四百十六石零湖州府屬除孝豐一縣尙不科米應免覈減外其餘六縣額徵米三十八萬十四石零擬減米九萬五千六百十三石零通計杭嘉湖三屬共減米二十六萬六千七百六十五石零等語加恩著照所請各按科則重輕分別上中下三則一律永遠減免以紓民力自此次減免之後該督撫務當督飭各該州縣按照奏定新章覈實徵收斷不准有浮收抑勒等弊至大戶包攬及一切漏規概行禁革以除積弊該督撫卽刊刻謄黃徧行曉諭務使實惠及民用副朝廷軫念民艱至意○乙亥諭軍機大臣等駱秉章續報克復階州擒獲啟逆各摺片與劉蓉前奏大略相同越楊夷匪出巢滋事勢頗猖獗西昌會理等處土匪亦復蜂起

周達武一軍著俟松潘番務完竣後卽著駱秉章酌度越雋等處情形何路喫緊卽先調此軍馳往何路剿辦前因雷正綰進攻靈州兵力不敷而安定被圍又復喫緊諭令駱秉章酌撥數營進駐安定以便雷正綰所派各營卽可調回茲據該督奏稱湘果右軍乏人統帶擬卽遣撤此軍素稱得力如見在尙未遣散卽著該督另派得力將弁統帶前赴安定助剿以厚兵力昨據給事中趙樹吉奏川省因地方官閉糴商民受困幸各處發倉平糴權濟一時今春又值天旱米價復騰自成都至夔巫數千里間斗米賣至五六千一二千不等若不早爲之所深恐激成變故請飭四川總督酌發倉穀嚴禁閉糴以濟民食各等語卽著駱秉章斟酌情形如果必須平糴卽著飭令地方官酌發倉穀以平市價並出示嚴禁所屬各州縣地方不得再行遏糴俾商賈暢行以資接濟其既發

之倉穀仍俟秋冬後飭屬設法買補原摺著鈔給閱看將此由六百里諭令知之○駱秉章奏查僞啟王梁城富倡亂以來流毒各省僞元帥蔡涓榮係滇逆李泳和餘黨尤爲狡悍擾川擾陝復自漢南竄犯楚疆遂與梁城富合股回竄陝西整鄂一帶經陝西撫臣劉蓉督師追擊該逆等仍由陝南奔竄沿途裹脅聚至三萬餘人因川北防堵嚴密遂竄陷甘肅階州經臣與陝西撫臣分派諸軍越境剿辦城外各壘以次攻拔並經四川提督胡中和甘肅臬司林之望督師合圍遂將州城攻拔除蔡逆已經陣斬外其僞啟王梁城富暨僞官蔡潮倖僞國舅曹汶玉等由總兵周達武押解赴省臣於訊明後已將該逆梁城富等處以極刑用彰國憲而昭炯戒報聞○丙子諭軍機大臣等吳昌壽奏查明統兵大員被參各節均無實據並請將應解曾國藩月餉留豫津貼各摺片張曜

被參各節既經吳昌壽查明並無養賊貽患及所帶兵勇到處搶掠實據卽著毋庸置議該撫見飭赴歸德一路防剿務飭該員嚴密堵剿迅掃妖氛庶不至再爲人指摘賊氛見在蒙亳逼近歸陳吳昌壽此次摺報何以未將賊勢軍情敘及著卽隨時偵探具奏姜玉順一軍經官文飭令畱紮楚豫之交惟遠防不如近剿萬一豫疆有警仍著吳昌壽檄調視何路緊急卽由何路迎剿毋得置之無賊之地蔣凝學所部軍餉已由湖北月解三萬兩惟豫省餉需竭蹶此軍餉銀著官文寬爲籌備源源接濟並由湖北派員專管此軍支發毋令缺乏僧格林沁舊部見在均隸曾國藩麾下河南應解該軍協餉自未便遽行停止仍著吳昌壽酌量緩急隨時接濟不得視同膜外將此由四百里各諭令知之○丁丑諭內閣國瑞奏續查負義昧良畏葸偷安各營員據實參辦一摺前因僧

格林沁陣亡業經降旨將未能保護主帥之外火器營副烏槍護軍參領奎祥革去副都統銜並保升參領茲據國瑞奏稱查該員身充戈什哈章京爲該親王親隨官兵領袖乃於該親王突圍後卽至曹州城內比聞該親王遇害該員仍復安坐曹州並不出城尋覓忠骸事前既疏於保護事後復畏葸偷安視同膜外實屬負義昧良奎祥著卽行革職從重發往軍臺效力贖罪以示懲儆巡捕營儘先都司王英奎健銳營委前鋒參領吉和春外火器營儘先空花翎護軍校保山黑龍江佐領錫林儘先佐領驍騎校哈爾吉善儘先防禦甲兵吉立善俱係充當戈什哈突圍時並未受傷均各私回濟甯殊出情理之外以上五員均著卽行革職候補主事開缺刑部筆帖式玉琦任意巧避畏葸偷安著一併革職副烏槍護軍參領倭什本佐領連喜向隨已革記名副都統成保辦理



營務聲名狼藉畏葸無能倭什本著以烏槍空花翎降備連喜著以驍騎校降補並拔去花翎參領西成副護軍參領玉全差使滑懶人品平庸西成著以驍騎校降補並拔去藍翎玉全著以護軍校降補○左宗棠徐宗幹奏官軍克復漳浦後臣等飭提督黃中元等進圖詔安行抵梅村疊次獲勝比至城下該逆已向烏山一路竄走當會同廣東官兵將縣城收復雲霄漳浦敗賊二萬餘人竄近平和經高連陞等迎擊生擒偽詳王黃濫芸餘賊殲除淨盡其偽利王朱逆僞來王陸逆兩股亦經王德榜殲斃無數餘賊投械乞降逆首丁汰洋竄至白土王德榜率軍夾擊斃賊四千餘名丁汰洋勢窮力蹙率眾赴劉典軍前乞降劉典當令丁汰洋挑選千人隨同剿賊立功其汪海洋一股自大埔回竄永定總兵王開琳飭丁長勝分軍扼紮距城三十五里之獵射凹屢戰皆捷詎汪

逆以一股撲永定縣城一股分犯獵射凹營壘先於要隘分築四壘以絕永定赴援之路復添築數壘困之丁長勝忍飢力戰相持兩晝夜逆賊愈裹愈厚破壘而入丁長勝力竭陣亡各營隨陷劉典飛飭已革參將劉大謨等會同延建邵道康國器馳援斃賊數千名賊勢不支向永定西北竄走侍逆敗股續竄永定獵射凹等處楊鼎勳等分路追殺斃賊極多張福齊等收降約萬餘名據降人何春貴等供侍逆於初二日夜帶傷從十數賊策馬過河擬奔汪海洋賊營惟時中流湍急多被溺死侍逆溺斃與否尙無確據見在該逆餘黨所贖不過數千林政楊夥黨亦擒斬殆盡惟汪海洋一股尙有數萬經各軍疊次勦辦兇燄仍張見在閩省沿邊節節皆有布置如江粵防軍能於邊境兜勦則逆賊無隙可乘自可收聚殲之效江西贛甯一帶空虛劉典已咨商王開琳收集各營

率赴贛州防剿臣於初十日馳抵漳郡一面趕籌糧運一面督軍躡追以冀迅掃餘氛仰紓宸廑永定獵射凹各營失陷王開琳咎有應得應請旨將候補總兵王開琳革職畱營以觀後效其力戰陣亡之總兵丁長勝懇恩准照提督例賜卹予諡並附祀湖南已故道員王鑫專祠遊擊陳觀光請照參將例從優議卹投誠之丁汰洋可否賞給守備銜令其立功自贖之處出自天恩又奏劉典一軍於四月十九日進規南靖適南靖上社小溪山等處之賊分路來援經我軍奮勇迎剿斃賊千餘名生擒百餘名該逆遂向小溪遁去劉典約會各軍於二十二日進攻縣城大隊奪門而入羣賊或伏地乞降或拌死衝竄李耀南楊芳桂等收降四千餘人其奪路竄走之賊截殺殆盡當將南靖縣城克復此次劉典督軍勦辦盡瘁馳驅勦績卓著惟係幫辦大員應否加恩之處臣等

未敢妄擬所有出力之副將張福齊等懇請獎勵伏候恩施 上諭軍機大臣等丁汰洋投誠已照左宗棠所請賞給守備銜著卽令其督率挑畱悍卒隨隊攻剿如不得力仍當嚴行懲辦遣散降人沿途能否安靜著咨明各督撫督同地方官嚴加約束以免復行勾結李侍賢是否被水衝沒仍著查明實在下落具奏汪海洋一股人數尙眾見在上杭一帶盤踞高連陞等軍已駐盧峰劉清亮軍亦剋日繼進著該督卽飭諸軍設法進剿並杜其旁竄之路上杭距粵東之大埔饒平江西之會昌長甯等處均屬切近著瑞麟等督同李福泰將潮防各軍實力整頓方耀等軍如能出境會剿卽飭該總兵等奮勉圖功爲一勞永逸之計賊氛逼近贛甯江省東路之防倍緊前諭調郭松林楊鼎勳二軍赴江閩交界處所駐紮該督曾否調派叛勇去江已遠席寶田等軍見紮何處著孫

長紱酌度情形趕緊調赴贛甯一帶扼防左宗棠仍遵前旨不分畛域派兵赴江迎前兜截毋任攔入完善劉典一軍聲威甚壯應如何調派之處著該督妥爲調度以期速竟全功同膺懋賞永定獵射四各營失陷詳細情形仍著查明具奏王開琳革職畱營著卽飭令收集各營迅赴江西贛州防剿立功自贖儻再有疏虞定卽從重治罪將此由六百里諭知瑞麟左宗棠徐宗幹郭嵩燾並傳諭孫長紱知之○諭都興阿穆圖善奏中衛被圍甯夏滿城喫緊回匪滋擾後路運道飭軍堵截並青海蒙古王公等呈遞稟詞常陞奏慶昫因病出缺逆回圍撲滿城各摺片中衛爲入省要衝見被逆匪圍攻萬分喫緊都興阿等擬抽兵由阿拉善草地繞越進剿及派員會同該旗籌運糧米卽著迅籌妥辦雷正綰所部進規靈州距中衛較近著懷遵前旨酌度軍情迅抽勁旅數營由南

路赴中衛援剿如成祿及鶴齡等軍進援安定業已解圍並著雷正綰將派往安定之軍調回數營前往助剿以厚兵力甯夏回逆因慶昫病故圍撲滿城勢甚兇狡本日已將穆圖善調補甯夏將軍著都興阿穆圖善先其所急抽撥得力數營繞赴滿城將撲城之賊擊退疏通糧路卽由中衛進取會合雷正綰所派援軍節次掃蕩都興阿等營後路時有回逆在紅柳溝等處四出滋擾窺伺運道蓄謀甚詭雖經官軍連日雕剿獲勝仍恐該逆乘隙肆擾餉道堪虞著都興阿等嚴檄翁同書各軍扼要堵截慎固定邊之防疏通餉運以待援師毋稍鬆懈楊岳斌前據奏報於閏五月初一日起程赴甘著俟到省後酌撥數營迅赴中衛助剿青海蒙古王公及阿家呼圖克圖等所遞稟詞均以西甯狃於議撫玉通等爲逆回箝制府城情形危殆請撥重兵往辦著楊岳斌就近派委明

幹大員酌帶勁兵馳赴西甯相機妥辦西甯見在同匪情形及梁生嶽營盤有無失陷均著該督查明速奏甯夏滿城防務仍著常陞激勵存城兵團嚴密布置與都興阿穆圖善之軍聯絡聲勢固守待援毋得稍涉大意阿家呼圖克圖稟詞一件著鈔給楊岳斌閱看將此由六百里各諭令知之○復提督馬德昭職命赴曾國藩軍營差委○以復平和等城功賞按察使劉典珍物予陣亡總兵官丁長勝祭葬世職○予直隸等處陣亡都統舒通額副都統恒齡等附祀僧格林沁祠○戊寅諭內閣馬新貽奏覈減金華衢州嚴州處州四府屬浮收銀米一摺浙江省各屬浮收錢糧疊經左宗棠等查明奏請覈減茲復據馬新貽奏稱查明金華府屬共減去錢十五萬六千一百餘串米五百二十餘石衢州府屬共減去錢十萬三千九百餘串米六十五石嚴州府屬共減去錢六萬

一千九百餘串處州府屬共減去錢六千八百餘串洋銀八千二百餘圓米一百二十餘石等語卽著照覈減新章辦理永遠遵行嗣後地方官吏斷不准別添名目於定章之外任意需索紳民人等亦須遵照定章完納不得再分大戶小戶致滋偏重該撫仍當隨時查察儻有前項情弊卽著從嚴參辦以重國賦而恤民瘼○諭軍機大臣等官文奏援甘楚勇潰散見辦情形吳昌壽奏髮捻麇聚毫東飭兵進剿並函商江皖兜剿各一摺蔣凝學一軍行抵襄陽復藉口索餉紛紛逃潰已散至八營之多見在折向省城形同叛逆深堪痛恨官文見飭姜玉順督率所部迎頭遏截著飭相機辦理如抗不就撫卽痛加剿洗並將爲首滋事之犯速行擒斬以儆兇頑被脅逃歸各勇務須妥爲撫輯以安善良前經疊降諭旨令官文楊岳斌飭令此軍折赴豫省剿捻歸吳昌壽調遣是蔣



凝學所部各營業已停止赴甘見在未散各勇尙有十一營著官  
文飛速傳知蔣凝學將疊次所奉諭旨曉示各勇以安眾心本日  
據吳昌壽奏稱擬在豫省添募勇丁數千毋庸借資楚勇請令蔣  
凝學一軍卽在樊城駐紮聽候朝命等語豫省既可就地募勇自  
無須遠調客軍所有蔣凝學一軍卽著畱於鄂省歸官文調遣並  
著飭令此軍移紮鄂省東北邊境以便堵截皖匪竄入楚北之路  
並責令蔣凝學將見在未散勇丁妥爲駕馭所有蔣凝學應得處  
分著暫行寬免儻再不能約束致所部勇丁續行逃潰卽著官文  
將該員嚴參治罪其見存未散之十一營欠餉仍著官文酌量情  
形籌款補給姜玉順一軍見辦潰勇未能赴豫官文已改調飛虎  
四營援豫卽著飭令迅速起程並著吳昌壽趕緊迎提以厚兵力  
髮捻麇聚毫東英翰雉河之軍四面受敵吳昌壽見飭張曜等軍

星夜馳援並咨商吳棠派兵出睢溪口臨渙集一路擣其東北喬松年派兵由潁上太和攻其東南合江皖豫三省兵力殲此醜類所籌尙合機宜著曾國藩迅派銳師相機進剿吳棠喬松年各派兵勇分路並進會同豫省官軍將此起賊匪四面兜圍剿除淨盡毋令乘閒旁竄又成不了之局吳昌壽俟募勇成軍卽率赴歸德一帶迎頭攔擊杜其竄豫之路昨據國瑞奏已令康錦文統帶郭寶昌舊部赴皖助剿喬松年務卽飛催前進與英翰一軍聯絡夾擊毋稍遲延將此由六百里各諭令知之○已卯曾國藩奏臣於閏五月初八日行抵清江疊據安徽布政使英翰稟稱五月二十五日擒匪竄陷高鑑集雉河糧路不通二十八日復有大股三四萬人猛撲該軍部將牛師韓頭營經我軍奮力轟擊賊始稍退盤踞各村四五十里外火光燭天擒獲賊黨供稱張總愚糾合任柱

牛洛紅賴汶洗等股銳意攻撲雉河營盤見在四面被圍萬分危急請派大隊星速救援又據總兵易開俊稟稱該軍奉調赴徐於五月二十七日行抵蒙城正值高鑑集被陷雉河圍困暫駐蒙城而賊眾分布渦河兩岸逼近蒙城糧路梗塞該軍僅三千人斷不能禦數萬之寇若馳援雉河深恐孤軍債事各等情伏查蒙亳雉河皆羣捻之老巢同治二年經親王僧格林沁擒斬各酋肅清該處議定於雉河設立新縣築城增防今捻逆四股合而爲一併力爭此以爲窟穴英翰以藩司大員素稱皖北得力之師萬一因援絕而潰則雉河北岸一片逆氛已屬不可收拾儻竟竄越淮南上而壽州六安至安慶下而廬州滁州至揚郡均屬屢年百戰恢復之疆土何堪再被蹂躪臣見檄調提督黃翼升水師由高良湖進洪澤湖以達臨淮總兵周盛波陸師出徐郡赴宿州以援蒙亳惟

水師難入小港不能竟達雉河陸軍不滿五千亦難解此重圍不得已飛調劉銘傳一軍自濟甯馳回徐州以拯皖北之危請旨飭下該提督星速旋軍先顧皖疆其潘鼎新一軍專爲拱衛畿輔而往不遽調赴他省臣所部楚勇因道遠年久力竭精疲此次金陵羅麓森等新募之軍甯國劉松山調出之軍見尙未至清江亦恐南人北征遷地弗良皇上命臣辦捻不能不專恃淮勇之力擬俟八九月間直東豫三省礮船造成臣親赴黃河驗畢或奏調潘鼎新兼顧東豫屆時再行請旨辦理臣俟步隊到齊卽當馳赴徐州相機調度又奏臣上次力辭節制直隸山東河南三省之命未蒙俞允在皇上略短取長不惜假以威柄而在臣度德量力實難任此事權況見在大股捻逆全趨皖境劉銘傳周盛波兩軍均已調回皖北助剿將來臣之兵力祇能顧及河南之歸陳山東之

兗沂曹濟其餘各府萬難兼顧直隸則遠在黃河北岸臣恐力不能逮徒冒虛名全無實際寸心惴惴深抱不安惟有籲懇 天恩明降諭旨收回節制三省成命俾臣不居極大之名稍安愚拙之分至於勦捻事宜凡思慮所能到才力所能及者自當殫竭血誠與三省督撫和衷商辦以冀迅殄逆氛 上諭軍機大臣等昨因毫東賊氛甚熾諭令曾國藩等派兵進剿茲據奏稱張總愚糾合任柱牛落紅賴汶洸等股匪銳意攻撲雉河營盤易開俊駐紮蒙城以兵單未敢馳援等語是髮捻各股合而爲一爭此要隘萬一官軍營盤援絕潰散則淮北一片逆氛益難收拾曾國藩見調劉銘傳馳回徐州以拯皖北之危卽著飭令該提督星速起程赴皖力解雉河之圍毋稍遲滯溫德勒克西等馬隊前有旨交色爾固善統帶由曾國藩調遣見在皖事孔棘必須添調馬隊以壯軍聲

著國瑞卽飭色爾固善率領所部馬隊迅赴曾國藩軍營此外馬步各隊除國瑞酌畱山東防剿外餘著一併交曾國藩軍營聽候酌撥援皖糧臺軍火等件均著交曾國藩軍營應用吳棠喬松年吳昌壽仍遵昨日諭旨合兵會剿以期聚而殲旃陳國瑞劉銘傳兩軍曾有互鬪之案此時同赴皖北剿賊該提督總兵夙知大義諒不敢以私廢公惟東省兵力尙薄儻賊匪乘虛回竄甚屬可虞陳國瑞一軍如尙未起程卽著國瑞傳知暫畱山東駐紮遏賊回竄毋庸赴皖如業已起程前進該軍應否駐紮淮徐一帶堵遏賊蹤抑調回山東之處著曾國藩斟酌妥爲調派其東省防守事宜閻敬銘當嚴密布置不得稍有疏虞劉銘傳一軍旣已赴皖直東防兵尙單潘鼎新一軍已到天津並著劉長佑崇厚飭令駐紮直東交界地方俾資策應曾國藩因節制三省任大責重復懇請收

同成命具見謙抑之忱第賊氛猖獗時事孔艱事權不專則一切調度事宜深恐呼應不靈該大臣惟當力任艱鉅與三省督撫和衷籌畫將此股賊眾剋期殄滅彼時三省軍務既平自可無庸該督節制既爲其實勿避其名萬不可存顧慮之心再有瀆請將此由六百里諭知曾國藩國瑞劉長佑吳棠閻敬銘喬松年吳昌壽崇厚並傳諭劉銘傳知之○諭文麟奏逆回猖獗請飭催援兵進剿並接仗失利情形各摺片濟木薩收復以後文麟派令兵勇分防三臺等處疊次接仗旋以寡不敵眾紛紛潰散大股賊匪見在阜康盤踞勢將東犯奇台一帶情形甚爲危急非得接應之兵迅速前往大局何堪設想德祥尤光組等軍疊次催令赴援見在究已行抵何處著楊岳斌恩麟查明飛催前進不得任意遲延成祿此時當已行抵安定聯捷亦已督隊赴甘著卽催提鶴齡一軍將

安定一帶道路疏通會合西行由肅甘出關勦賊毋稍遲延觀望致誤事機黎獻一軍進勦甘州回匪兵力尙單著楊岳斌恩麟檄令林之望卽移得勝之師迅赴肅甘聯絡黎獻之兵合力進擊將該處回匪撲滅庶以後出關之軍不至梗阻都興阿穆圖善速將甯夏等處賊匪奮力勦除以便抽兵出關該將軍等總當力顧大局迅籌辦理以紓朝廷西顧之憂援兵未到以前文麟仍當激勵民勇固守奇台濟木薩等處毋稍疏失巴里坤哈密等城並著文麟隨時知照該城大臣等嚴密籌防以備不虞將此由六百里諭知都興阿穆圖善楊岳斌成祿聯捷並傳諭文麟知之○庚辰諭軍機大臣等瑞麟郭嵩燾奏東路沿邊防軍追賊獲勝賊由上杭繞道竄入鎮平見飭各軍分路堵勦一摺據逆由永定屯聚上杭經副將林保等節節進擊賊勢不支竄至鎮平見屯上都象洞等



慮該署督撫見飭李福泰移紮嘉應飭卓興嚴堵龍川縣之老隆以固惠韶令林保等分守隘口杜賊走興長嘉應之路方耀等軍飭赴鎮平協攻所籌均尙周妥著卽督飭在事各員弁實力勦辦務期與江閩各軍會合痛殄餘氛毋畱遺孽侍逆李侍賢前據左宗棠等奏有被水衝沒之說茲據瑞麟等奏在永定自刎究竟已否身死仍著查明實在下落具奏該督撫每於具報勝仗一次必隨摺保舉多員此次姑念該員弁等出境勦賊有功從寬照准惟逆眾由閩入粵粵省各軍何以不能堵截入境之路著責令方耀等認真防剿毋令旁竄嗣後保舉務須覈實遇有小勝暫行存記俟此股賊匪殄盡方准彙案保獎將此由五百里各諭令知之○諭勞崇光奏查明滇省臨安漢回互闖緣由見籌兵餉剋期赴滇一摺雲南臨安漢練梁士美等懷挾私忿與省同構釁雖經勞崇

光祿令止鬬息爭尙未能聯爲一氣馬如龍有志向上力尙能箝制諸回而同民賦性梗頑仍多首鼠兩端游移莫定馬如龍勢處孤危誠恐遲延生變亟須督撫大吏馳赴滇垣妥籌鈴束馬如龍有所稟承自必倍加奮勉不特所部回眾易於懾服卽臨安漢練見馬如龍奉令惟謹亦不至再生異議勞崇光見擬於黔省各營內酌撥兵一千名並籌餉銀二三萬兩帶往卽著與張亮基等會籌迅辦剋期起程馳赴滇省東路實力辦理毋得以兵餉未裕爲辭竟致徒託空言有負委任仍嚴飭梁士美馬如龍等蠲除私忿聯絡進取一以期除杜逆爲事將迪西郡縣次第廓清以靖邊圉滇省軍事一切著該督懷遵疊次諭旨與林鴻年和衷商辦毋得稍存意見致誤事機將此由六百里諭令知之○諭勞崇光奏請將發遣要犯由經過省分依次接解等語貴州田興恕案內應發

新疆之革員張茂萱卽張心培謝葆齡均係獲罪要犯勞崇光等以道路遼遠經過地方軍務未靖動須繞越解官未能熟悉路徑深恐疏虞請援照廣西成案由四川陝西甘肅依次接解自屬實情著照所請一俟黔省將張茂萱等解至四川省城卽行由川解陝由陝解甘駱秉章楊岳斌劉蓉務飭各該省所派委員小心接遞押解毋稍疏忽嗣後遇有發遣官犯一體照辦俟軍務肅清再照舊章辦理黔省前解赴川之已革武舉陳和鈞一犯著駱秉章卽行一併起解田興恕是否尙在四川省城並著崇實駱秉章將該革員速行起解毋得日久稽延將此由五百里各諭令知之○以故科爾沁博多勒噶台忠親王僧格林沁靈柩回京行抵直隸夏鄉縣命御前大臣景壽往奠茶酒○辛巳諭軍機大臣等總理各國事務衙門奏據總稅務司赫德呈稱番禺縣第四號巡船有

漏稅洋藥二百餘箇經粵海關扞手頭日鮑朗查拏並起獲番禺縣旗幟燈籠軍營破火等件又差票二紙其爲該縣巡船無疑平日走私諒不止此一次該縣何得毫無覺察難保無知情故縱從中漁利情弊著瑞麟郭嵩燾師曾訪查確實迅將此案人犯全行拏獲將洋藥船隻照例入官並查取番禺縣職名照案參處以清弊竇原摺著鈔給閱看本日復據御史潘斯濂奏粵省捕務因循盜風日熾請飭督撫認真整頓一摺若如所奏南海番禺順德三縣劫案甚多獲案者不過十之一二州縣官置民事於不問竇堪痛恨著瑞麟郭嵩燾按照單開逐一清查嚴飭地方文武上緊緝拏如捕務不能振作卽行從嚴參辦另片奏桑園圍爲粵省糧命最大之區當西北兩江之衝稍遭缺陷工鉅費繁向有生息銀兩以爲歲修之費近年將本息銀兩全數提用從此歲修無措水患

難免於兩縣生民大有關係等語著瑞麟郭嵩燾將咸豐四年提  
用桑園園原撥帑本暨歷年存庫息銀一項查明已還未還各數  
目設法歸款照舊發商生息爲禦災捍患之計原摺片單均著鈔  
給瑞麟郭嵩燾閱看將此諭知瑞麟郭嵩燾並傳諭師曾知之○  
壬午 上詣 大高殿祈雨○諭軍機大臣等國瑞奏分撥兵勇  
火器開單呈覽並糧臺贖銀數目候旨移交喬松年奏皖北賊勢  
益熾見飭各軍遇勦吳昌壽奏豫軍節節進紮催調援師會勦各  
摺片逆匪盤踞高鑪集一帶圍攻雉河龍山等處營盤賊勢甚重  
喬松年見飭英翰易開俊等軍穩守待援吳昌壽亦飭張曜宋慶  
等軍進紮亳州迤東之白水河等處爲節節進勦之計此股賊匪  
向以往來奔突爲長技以致此勦彼竄迄無了期見在該逆麇聚  
於皖北境內正可乘其攻奪營壘之時設法牽制一面會合江皖

豫之兵四面兜圍絕其竄越之路方可聚而殲旃曾國藩前已行抵清江著卽飛速赴徐催提劉銘傳一軍星夜南行籌商進剿其皖豫兩省之軍應如何擇要扼紮會合進兵之處均著曾國藩商同喬松年吳昌壽妥籌調派總期層層布置將此股賊匪就地殲除斷不可失此機會致令乘閒他竄又難收拾清淮防務稍鬆所有張樹珊等軍卽著吳棠飭令迅赴皖境合力攻剿不得稍分畛域雉河等處營盤見雖尙能堅守惟恐援兵日久不至致有疏失喬松年仍當一面督飭各軍穩慎固守一面飛催援軍剋期會剿以期迅殄賊氛見在直隸已有新調之吉林黑龍江馬隊各五百名而河南兵力尙單國瑞擬將托倫布所帶馬隊官兵四百九十六員名撥交劉長佑之處著改撥河南交吳昌壽酌量調遣以利攻剿其烏爾圖那遜等馬隊官弁兵勇一千三百餘名著國瑞挑

撥精銳數成馳赴雉河集交喬松年相機調遣其餘著移交閻敬銘調遣富森保馬隊三百餘名並善慶兵一百八十餘名著統交吳昌壽調遣以厚兵力吳昌壽一面催提此項兵勇到齊卽令赴皖助剿汴梁各局製造軍火匠役吳昌壽亦可酌量提用至擬留之山東勇丁四千名其中頗多降眾約束不嚴恐致聚而生事著酌留兩營由閻敬銘統帶餘著撥交曾國藩調遣國瑞擬請撤遣各營馬步官兵及將葛開泰等營撥歸崇厚調遣並撥帶礮位軍火器械之處均著照所請辦理卽著國瑞咨明各該省督撫按照單開數目收明應用其存儲陳州府庫餉銀二十萬兩著交曾國藩查明存案如江皖豫三省何路軍需緊要卽由該省商同曾國藩酌量提撥應用國瑞單開之河南山東局存之軍火器械著曾國藩酌量調取詹啟綸一軍見紮碭山並著該大臣酌量調派歸

德糧臺所存之五萬兩並著國瑞飭令盧朝安擲節支放覈實報銷毋許稍有冒濫將此由六百里各諭令知之○癸未撥察哈爾官馬四百匹赴聯捷軍營○甲申諭內閣本日科爾沁博多勒噶台親王僧格林沁靈柩到京著派醇郡王帶領侍衛十員卽日前往奠醊並奉 慈安皇太后 慈禧皇太后懿旨以僧格林沁歷荷 三朝恩眷朕御極以來該親王連年在河南山東等省督師勦賊懋建殊勳公忠體國 慈懷優眷倚畀方殷迺於本年四月間在曹州府力戰陣亡茲值靈柩旋京愈深悲惋 命朕於二十六日親臨賜奠用申 慈惻以示優崇○諭軍機大臣等楊岳斌奏行抵涇州未及分兵駐守潼關一摺前諭楊岳斌於帶赴甘肅之勇隊內酌畱數營扼守潼關見在該督業已由涇州進發隊伍先驅計程愈遠自未便紆道折回見在髮捻各匪擾及蒙亳等處



難保不被擊西竄潼關一帶防務緊要著劉蓉派兵前往扼紮以固邊防毋稍疏虞階州見已克復蕭慶高一軍能否調赴東路並著劉蓉懷遵前旨酌量辦理安定雖已解圍而甘省逆氛徧地尙肆鴟張著楊岳斌統率所部迅赴蘭州省城妥籌剿辦埽蕩逆氛以副委任將此由六百里各諭令知之○丙戌諭內閣前據勞崇光等奏生擒首逆包茅仙酌保出力各員一摺當經降旨將署知府陳昌運等給予獎敘茲據勞崇光張亮基奏拏獲包茅仙正身請將前次保案撤銷一摺據稱上年八月間銅仁府屬兵練擒獲包茅仙之弟包小三因該犯畏罪自刎未取生供該處紳民誤認爲包茅仙正身經該地方官紳嗣經查訪包茅仙尙未就獲復行懸賞購緝經把總余杰芳等於本年正月間在寨轉地方將包茅仙正身殲斃並殺斃夥匪五十餘名生擒包林林等十二名查驗

屬實所有勞崇光等前次誤保之署知府陳昌運等獎案著卽撤銷其續獲包茅仙正身出力各員著該督查明另行擇尤奏獎毋許冒濫罔首李丕基雷洲等有無與包茅仙暗通往來情事仍著張亮基督飭該地方官詳細研訊毋稍枉縱○諭軍機大臣等德勒克多爾濟等奏蒙古官兵擊退竄匪見飭嚴防一摺甘肅回匪糾合逆黨千餘名擾及花馬池定邊一帶邊牆希圖竄越經在防蒙兵督隊迎剿殺斃回匪七十餘名見在該逆仍在花馬池定邊一帶分股盤踞肆擾該處邊防遼闊設被該匪越出邊牆東竄蒙古地方蔓延愈廣更難收拾仍著德勒克多爾濟等嚴飭在防蒙兵勤加偵探嚴密扼守遇賊卽擊毋令匪蹤偷越並咨知都興阿兼嚴後路之防方爲妥善此項蒙古官兵因所領口糧短絀情形甚爲拮据雖經各該旗扎薩克王公等量力捐輸尙恐緩急難恃

沈桂芬照依本境防兵章程改放津貼不敷人馬日用該官兵等防剿正在喫緊豈能枵腹荷戈著該撫於該官兵等應領口糧外酌量加增一面飭催歸綏道趕緊籌給俾資接濟將此由五百里各諭令知之○黔匪陷綏陽縣城○予陣亡副將張萬書知府邵維新祭葬世職建祠○丁亥以 文宗顯皇帝 孝德顯皇后梓宮永遠奉安命恭親王恭理喪儀○准患病江甯將軍富明阿開缺回旗調理並賞食全俸○戊子嚴催各省籌解京餉○己丑上臨故科爾沁博多勒噶台忠親王僧格林沁賜奠○諭內閣理藩院等衙門奏遵議督師重臣卹典請旨遵行一摺本月二十一日科爾沁博多勒噶台親王僧格林沁靈柩旋京朕奉 慈安皇太后 慈禧皇太后懿旨於本日親往賜奠睽懷忠藎悲惋愈深允宜再沛殊施以彰優禮僧格林沁之孫那爾蘇所襲貝勒著再

加恩作爲世襲罔替伊次孫溫都蘇並著賞給輔國公用示軫念  
舊勳有加無已至意餘著照所擬賜卹○曾國藩奏臣本擬步隊  
到齊卽日馳赴徐州相機調度連日接據安徽布政使英翰來稟  
該軍困於雒河集已先帶二十餘騎退至西洋集其部將史念祖  
等尙能相約死守以待援兵又據壽春鎮總兵易開俊來稟該軍  
進紮西洋集擬先攻高鑑以解雒河之圍惟該總兵目疾增劇勢  
將暫廢請派員接統該軍各等情臣查英翰出重圍而求援易開  
俊臨大敵而嬰疾均屬萬分危急臣若先赴徐州則去賊愈遠而  
諸軍無所稟承適接撫臣喬松年咨函亦稱賊聚皖北官兵正可  
合圍會剿爲一勞永逸之計臣與吳棠熟商遂定議親率金陵六  
營甯國六營先赴臨淮關駐紮俟皖事稍鬆再行進駐徐州臣初  
次奏稱專力於四省十三府州之地今旣由臨淮進兵將來安徽

卽以臨淮爲老營江蘇卽以徐州爲老營山東以濟甯爲老營河南以周家口爲老營四路各駐大兵多儲糧草子藥爲四省之重鎮一省有急三省往援其援軍之糧藥卽取給於受援之地庶幾往來神速呼吸相通就目前諸將而論劉銘傳潘鼎新均可獨當一面張樹聲周盛波兩軍相合可當一面劉松山易開俊兩軍相合可當一面四路專汛之兵頗敷分布此外須另籌游兵一枝擬派候選郎中李昭慶訓練馬隊合之親王僧格林沁舊部馬步各軍同爲遊擊之師臣私衷區畫如此軍情瞬息千變不知將來能成此規模否至糧運爲用兵第一要義周家口臨淮兩軍以淮河潁河爲運道濟甯徐州兩軍以運河爲運道擬趁有水時將米糧子藥悉數分運四處存儲備用已在清江設立轉運局派淮揚道吳世熊專司此事如四路軍食充足則四省有首尾相應之勢而

諸軍無疲於奔命之虞或可以速補遲徐圖功效又奏接奉諭旨  
令國瑞將應畱兵勇軍火交臣接管查目前皖北危急臣改駐臨  
淮不能親赴濟甯並不能遽抵徐州國瑞勢難久待應由臣派員  
前往經理交代事件查前任浙江鹽運使李榕隨臣北上擬即派  
令前往濟甯稟商國瑞將親王僧格林沁原部馬步各隊及應行  
交代之件逐一承領又奉諭旨潘鼎新等駐師張秋令臣酌量調  
派據臣愚見此時直隸兵力儘敷分布潘鼎新一軍似應由張秋  
移紮濟甯一則曹濟等處敗兵游勇極多必須有重兵鎮壓一則  
徐州濟甯兩軍互相犄角可以伐賊回竄之謀如蒙俞允臣卽札  
飭潘鼎新速至濟甯會同李榕料理交代事宜凡國瑞應畱兵勇  
軍火均將清冊交李榕潘鼎新接管其溫德勒克西等馬隊遵旨  
交色爾固善管帶應令卽赴徐州聽臣就近調遣至豫省防剿亦

屬緊要陳國瑞一軍應暫赴歸德駐紮如歸德無賊卽赴南汝光  
三屬防剿聽吳昌壽調遣毋庸再赴皖境如已入皖界亦應折回  
豫省以遏逆匪回竄之路 上諭軍機大臣等曾國藩所籌均屬  
妥協卽著該大臣飭令李榕前往濟甯將僧格林沁原部馬步各  
隊及應行交代之件逐一承領俾國瑞得以交卸回京曹濟等處  
敗兵游勇極多不可無重兵鎮壓所有潘鼎新一軍著卽調赴濟  
甯駐紮仍兼顧曹考一帶以固直東門戶見在羣賊雖聚於皖境  
而北路防務仍不可稍鬆劉長佑崇厚閻敬銘當各就見有兵力  
勤加訓練認真整頓以備不虞英翰因雉河被困先帶二十餘騎  
退至西洋集雉河自更危急易開俊臨敵患病英翰求援甚切曾  
國藩自應馳赴臨淮督率各軍力解雉河之圍務將此股逆匪悉  
數殲除以收一勞永逸之效本日據左宗棠奏閩境肅清請將援

聞之郭松林楊鼎勳兩軍回蘇候調業已降旨照准如皖省兵力不敷兜剿卽著曾國藩李鴻章酌量調派以資得力清淮一帶向爲該匪所窺伺吳棠仍當隨時檄飭各軍嚴密防守不可以賊蹤漸遠稍涉懈弛曾國藩另片奏豫省防剿緊要見調陳國瑞帶兵暫赴歸德駐紮等語陳國瑞一軍業已調赴歸德卽著歸吳昌壽調遣不必再赴皖境各該省協撥陳國瑞一軍之餉均著解交吳昌壽隨營糧臺由該撫派員經理源源撥給毋令缺乏見在直東皖豫據該大臣籌辦情形尙臻周密惟山西省兵力空虚防堵亦不甚可靠沈桂芬亦非知兵之人捻逆乘虛奔突是其熟技況該省完善又素所垂涎該大臣務須調出勁旅一枝兼防秦晉門戶更臻妥善將此由六百里各諭令知之○左宗棠徐宗幹奏高連陞等駐軍平和將漳浦雲霄竄賊殲除後比抵永定汪逆已向上



杭中都竄走侍逆餘黨亦續由大姑灘逃逸高連陞等躡蹤緊追五月初十二等日出隊至大姑灘對岸該逆率眾渡河回撲經官軍擊敗高連陞等遂率各營進紮大姑灘上下沿河密布營壘時悍賊數千將所紮木緯千餘架搬至河邊正圖搭架浮橋官軍突至槍礮齊發汪逆亦令悍黨拚死抗拒官軍縱擊歷三時之久斃悍賊數百名賊猶死拒不退高連陞等各挑洋槍隊百人潛從大姑灘躍淺過河瞥見山頭號火齊發知汪逆嗾羣賊來援高連陞等麾洋槍隊速前薄之羣賊頭旗悍賊一名羣賊驚駭乃棄馬翻山而遁河邊搭橋之賊同時竄走官軍乘勢壓擊斃悍賊三百名生擒二十六名墮崖落水死者千計時劉清亮畱駐湖雷各營會同追剿斃賊無算黃少春等擊敗於中赤地方該逆已向下壩逃竄官軍追擊斬賊二百餘名高連陞等進駐下壩計各戰擒斬

逆賊竄不下三四千名竊維李侍賢汪海洋等逆由江粵竄閩連陷府廳州縣幸賴 聖謨廣運飭浙軍迅赴戎機資以浙餉復飭蘇軍赴閩助剿數月之間得將各城次第克復全境一律肅清李侍賢林政揚兩股擒斬殆盡丁汰洋一股窘蹙投誠僅餘汪逆一股夥黨數萬偪聚江閩粵三省之交直趨嘉應州臣等已飭康國器及關鎮邦所部粵勇五千餘人由峯市追剿翼與粵東嘉應官軍共收夾擊之效惟汪逆本謀竄江似不久畱粵境臣等已飭王開琳率所部老湘營由汀赴贛其高連陞黃少春劉清亮三軍轉戰千里竄屬勞瘁應暫畱武平休息劉典一軍俟整理就緒後亦卽由汀贛或徑赴南安截其由江西竄湖南之路期將此股殲除稍紓宸廑 上諭左宗棠等奏官軍剿賊獲勝全閩肅清見飭越境追剿請調援閩得力之軍回蘇及查李侍賢下落各摺片汪

逆由上杭中都敗走先竄鎮平復由粵東邊界竄去有直趨嘉應  
州之勢左宗棠已飭康國器及關鎮邦各部粵勇五千人由峯市  
追剿此軍到粵必可得力著瑞麟郭嵩燾督飭方耀等會同閩軍  
認真擊剿李福泰已移紮嘉應諒已早有布置卽著飭令該藩司  
等三面兜擊以期一鼓殄除毋任再有竄逸高連陞黃少春劉清  
亮等軍暫駐武平稍爲休息仍著左宗棠飭令覘賊所向實力遏  
截以資得力汪逆本謀竄江未必久畱粵境孫長紱務當懍遵疊  
次寄諭將贛防密爲布置督飭派出諸軍與左宗棠所派之王開  
琳一軍實力防剿毋任逆蹤竄近邊界劉典一軍或由汀赴贛或  
徑赴南安截其由江西竄湖南之路著左宗棠斟酌軍情緩急調  
派李侍賢一犯或云衝沒或云被擒或云自刎尙無實在下落仍  
著查明具奏郭松林楊鼎勳二軍卽照所請飭令迅速回蘇聽李

鴻章調遣崑壽已放杭州將軍著俟到任後將旗營一切事宜妥爲經理以副委任將此由六百里諭知瑞麟崑壽左宗棠徐宗幹郭嵩燾並傳諭孫長敘知之○予福建陣亡副將黃璧祭葬世職○庚寅諭內閣朝廷綜理庶政終日乾乾無事不以敬 天勤民爲念今乃恆賜示儆未沛和甘意者恐懼修省之忱有未摯歟抑用入行政之間不無缺失歟朕奉兩宮 皇太后惟當益加修省冀格 天心在廷臣工亦應交相儆惕著有言責諸臣摠誠獻替直言無隱京外問刑衙門並著趕緊清釐不得積壓拖累以消禳戾而迂休和○諭軍機大臣等喬松年奏皖北近日軍情一摺捻匪圍攻雉河營盤甚急日日添營勢益兇狠雉河營中糧米僅敷見月食用岌岌可危英翰旣離雉河前赴西陽集合軍回救則設法運送糧米入營爲第一要著喬松年務督飭英翰並激勵易開

俊張得勝等軍奮勇進攻以便護送糧米運入雒河毋得遲延觀望致干重咎至賊匪大股麇集雒河正可乘此機會四路進剿爲聚而殲旃之舉張曜宋慶兩軍已抵亳州周盛波一軍已抵宿州卽著曾國藩吳昌壽迅催各軍星夜前往雒河解圍通餉一面飛提劉銘傳康錦文諸軍趕緊赴亳一俟諸軍到齊卽可將圍攻雒河之賊四面兜剿曾國藩仍遵昨日諭旨馳赴臨淮指揮調遣務將該逆就地圍殲毋令再行他竄清淮等處防兵如可分調卽著吳棠酌撥數營馳援皖北不可稍分畛域並著曾國藩李鴻章將由閩回蘇之郭松林楊鼎勳兩軍酌量調援亳州以厚兵力蒙城團練旣能守圩殺賊卽著喬松年激勵鼓舞以期兵民合力眾志成城將此由六百里各諭令知之○辛卯諭軍機大臣等都興阿穆圖善奏官軍馳援甯夏滿城立解城圍楊能格奏慶防官軍攻

克鐵角城疊獲勝仗各一招逆回糾黨築壘圍撲甯夏滿城經都  
與阿等親督官軍攻拔賊壘多處斃賊二千餘名城圍立解其緊  
靠郡城之西門橋各賊壘復經官軍一律平毀偏城而營卽著都  
與阿穆圖善乘此聲勢激勵兵勇迅將甯夏郡城剋日攻拔不得  
再有耽延致干咎戾楊能格當設法籌款將甯夏官軍糧餉源源  
轉運毋令缺乏固原竄逆圍擾中衛此股不除於甯夏一軍終形  
掣肘著雷正綰懍遵前旨督飭援軍迅解中衛之圍埽蕩逆氛以  
收夾擊之效毋稍遲誤慶防官軍分路剿賊攻克鐵角城逆巢挫  
斬逆酋哈伏威等尙屬奮勉所有歷次尤爲出力員弁准由楊能  
格彙案保奏不准稍有冒濫回逆詭譎異常見在東竄保安縣境  
並圖窺伺安化縣元城鎮難保不牽綴我師暗爲甯靈犄角著楊  
能格督飭魏添應等相度機宜實力防剿並著劉蓉添撥兵勇馳

赴延安鄜州安邊保安等處扼要堵截不得稍有疏虞前據德勒克多爾濟等奏稱回匪千餘名擾及花馬池定邊一帶邊牆希圖竄越當經諭令德勒克多爾濟等查明都興阿兼嚴後路之防此時甯夏官軍進紮西門正在得手之際該將軍仍當分撥兵勇將花馬池定邊一帶回匪先行剿除肅清後路毋任甯夏大營兵勢爲所牽掣將此由六百里諭知都興阿穆圖善雷正綰劉蓉並傳諭楊能格知之○壬辰諭軍機大臣等早保奏盜匪出竄添兵追剿一摺奉天鐵嶺開原一帶賊匪突由圍場出竄擾及吉林界放牛溝屯擄殺差役署長春廳通判博霖訓練剿捕於靠山屯接仗失利被拒斃五六十名另股竄至蘇瓦延站北奢嶺口經協領富明阿帶兵追至半拉山門邊外太陽溝斃賊二十餘名番役傷亡六十餘名該匪逃往北荒此股賊匪分竄吉林邊界者爲數僅百

餘人或數十人輒卽傷斃官役至七八十名之多可見該地方官平時毫無準備跳梁小醜亦不能制實屬可惡阜保摺內所稱盜匪百餘人又另股七十餘人恐尙不止此數該處爲兩省毗連處所此拏彼竄最易藏奸著阜保迅飭添派之佐領那斯洪阿等督帶兵役覘賊所向實力兜撿不准存五日京兆之見並著玉明調派官兵會同堵剿挖捕務期盡絕根株不准因循貽患其蒙古地方並由玉明知照一體督兵嚴防毋任闖入恩合已簡放吉林將軍著侯慶春到任卽行迅赴吉林將剿捕事宜妥爲調派慶春著迅速前赴錦州新任毋庸俟富平阿到任交卸並著阜保飭令富平阿卽赴盛京副都統新任以重職守以上各員均著毋庸來京請訓將此由四百里各諭令知之○癸巳諭內閣前因都察院奏已革馬蘭鎮總兵慶錫等爲伊故父耆英鳴冤死由肅順激怒妄



奏請代奏昭雪一摺當經降旨交刑部覈議具奏茲據該部奏稱  
耆英因事獲咎先經惠親王等奏參正法嗣經恭親王惇親王會  
同大學士六部九卿遵 旨定擬量予末減定爲絞監候入於情  
實肅順因意見不合仍請卽行正法 文宗顯皇帝飭紀加恩不  
忍棄之於市賜令耆英自盡 聖訓煌煌久經垂示所有慶錫等  
代父懇請昭雪之處未敢擅議等語此案耆英以獲咎大員蒙  
文宗顯皇帝棄瑕錄用宜如何激發天良力圖報稱乃因桂良等  
奏請令該員回京耆英不候 諭旨擅自折回冒昧糊塗實屬自  
速其死我 文宗顯皇帝博採眾議權衡至當僅予賜死思盡情  
法兩全之道所有慶錫等呈請代父鳴冤懇恩昭雪之處業據刑  
部查明原案覆奏著毋庸議惟肅順因意見不合輒單銜奏請卽  
行正法原奏內稱苟延歲月儻以病亡獲保首領等語措詞不倫

在肅順當時無非欲藉以攬權立威使朝臣莫敢誰何以遂其罔  
上行私之計業經欽奉 硃諭駁斥肅順亦因另案正法肅順之  
子著不准其出仕以昭炯戒○諭軍機大臣等張凱嵩奏梧州官  
軍疊破賊巢生俘首逆見飭接捕餘逆一摺逆首霍十八獷悍兇  
橫倡亂潯梧積年漏網匪徒紛紛響應經張凱嵩派令蔣澤春等  
增軍集練一月之閒擣穴擒渠殲斃著名匪首多人辦理尙爲得  
手著卽飭令吳光春會同粵東派來之曾敏行一軍剿捕梧州餘  
匪賀三元會同覃遠璉募勇捕拏潯州餘匪毋得稍畱餘孽致貽  
後患見在潯梧已可漸次肅清而那檀山澤大兵合圍劉坤一已  
放江西巡撫卽須赴任蔣澤春一軍應否飭赴那檀山澤之處著  
張凱嵩酌度調派以資得力另片奏鎮安府屬有小張三等匪滋  
擾經知府與福督率兵團剿辦頗有斬擒餘匪奔回馬隘著卽督

飭該府整頓兵練乘勝擣巢及時撲滅首民陸潤庭自應准予自新惟此輩忽團忽賊終不可恃仍著隨時察看如能始終奮勉再行酌量加恩以示鼓勵將此由五百里諭令知之○予安徽殉難知縣宋維屏祭葬世職○是月豁免浙江長興等五縣被擾新舊額賦蠲免福建龍巖等三十六州縣暨汀軍等廳溪口泉上各州同縣丞所屬被擾額賦緩徵山西解州歉收節年積欠倉穀